







934



臨川先生文集  
+









臨川先生文集卷第四十七

內制 詔書

勅賜交趾

提轉考課勅詞

韓琦加恩制

李璋加恩制

皇伯祖承亮加恩制


李日尊加恩制

馮翊郡君連氏等賀南郊禮畢表

德妃苗氏上賀南郊禮畢表

賜梁適張昇特赴闕南郊陪位詔

賜允梁適陳乞不赴南郊陪位詔





賜允張昇不赴南郊陪位詔

賜王拱辰乞南郊赴闕不允詔

賜允韓琦乞相州詔三道

賜韓琦依所乞詔

賜韓琦乞相州不允詔三道

賜韓琦乞致仕不允詔

賜韓琦湯藥詔

賜富弼乞判汝州詔

賜富弼上表乞致仕不允詔

賜允富弼乞假養疾詔

賜允富弼乞赴汝州避災養疾詔

賜富弼赴闕詔二道

賜富弼赴闕并茶藥詔

賜富弼辭免南郊禮畢支賜詔

賜宰臣曾公亮已下辭南郊賜賚不允詔

賜陳升之辭免恩命不允詔

賜陳升之赴闕朝見茶藥詔

賜歐陽修上表乞致仕不允詔三道

賜歐陽修辭知青州不允詔二道

賜荅曾公亮詔

賜張方平免特支請俸詔

賜邵亢乞郡詔

賜皇伯從式乞免新命不允詔

賜蔡挺茶藥詔



賜蔡挺獎諭詔

賜高賦獎諭詔

勅牘交趾

勅交州管内溪峒軍民官吏等眷惟安南世受王爵  
撫納之厚實自先朝含容厥愆以至今日而乃攻  
犯城邑殺傷吏民干國之紀刑茲無赦致天之討師  
則有名已差吏部員外郎充天章閣待制趙高充安  
南道行營馬步軍都總管經略安撫招討使兼廣南  
安撫使昭宣使嘉州防禦使入內侍省都押班李  
憲充副使龍衛四廂都總管指揮使忠州刺史燕達  
充副都總管順時興師水陸兼進天示助順已兆布  
新之祥人知侮亡咸懷敵愾之氣然王師所至弗牙

克奔咨爾士庶久淪塗炭如能諭王內附率衆自歸  
爵祿賞賜當倍常科舊惡宿負一皆原滌乾德幼稚  
政非已出造廷之日待遇如初朕言不渝衆聽無惑  
比聞編戶極困誅求已戒使人具宣恩旨暴征橫賦  
到即蠲除冀我一方永爲樂土

提轉考課勅詞

先王考績之次序雖見於經而其詳不傳於後世朕  
若稽古以修衆功而諸路刺舉之官未有以考其賢  
否比勅有司詳議厥制條奏來上詢謀悉同其使布  
宣以勵能者而擇左右可信之良使典治之古人有  
言徒善不足以爲政徒法不能以自行今朕有念功  
樂善之志焉而又繼之黜陟幽明之法以待天下之



大吏矣然非夫任事之臣躬率以正而考慎其實與士大夫宣力于外者皆安于禮義而不以便文徼幸爲姦則朕之志豈能獨信於天下而法亦何恃以行哉咨爾在位其各悉力一心務祇新書以稱朕至誠惻怛之意

韓琦加恩制

門下朕祇率舊章肇稱吉禮對越天地具獲靈明之歆相維公卿並膺休顯之賜其亨大號以寵元勳推誠保德崇仁守正協恭贊治亮節翊戴功臣淮南節度揚州管内觀察處置營田等使開府儀同三司守司徒檢校太師兼侍中行揚州大都督府長史上柱國魏國公食邑一萬三千七百戶食實封五千戶韓

琦躬受偉材出陪熙運保茲天子進無浮實之名正是國人退有顧言之行間朝廷之兩社揉方域之萬邦辰猷具臧器寶加重中辭機軸之要外即蕃屏之安衡統紘緹備三公服飾之盛橐兜戟纛兼大將威儀之多序績旣崇修方彌謹協成宗祈之禮與有顯助之勞肆行本封申加美稱於戲恩典徽數所以旌帝臣明德茂功所以獎王室往惟勵翼服此褒嘉可特授依前守司徒檢校太師兼侍中行揚州大都督府長史魏國公充淮南節度揚州管内觀察處置營田等使加食邑七百戶食實封四百戶仍賜推誠保德崇仁守正協恭贊治亮節佐運翊戴功臣散官勳如故主者施行



李璋加恩制

門下朕若昔大猷紹天明命必有獻享之禮作民恭先必有褒嘉之恩自國貴始翊衛功臣奉寧軍節度鄭州管内觀察處置河堤等使光祿大夫檢校司空使持節鄭州諸軍事鄭州刺史兼御史大夫上柱國平原郡開國公食邑四千三百戶食實封一千戶李璋世載忠善躬服儉勤以后家之洪支爲帝室之隆棟入摠營衛則兵師無譁出乘蕃維則吏屬不怠近付京都之籥外更方鎮之旄貢職惟修祀儀獲考進加功號申衍邑封以疇服采之勤其協勸勞之典於戲貴富有危溢之可戒祿位匪侈驕之與期圖惟慶譽之終尚協龍光之施可特授依前檢校司空使持節鄭州諸軍事鄭州刺史兼御史大夫充奉寧軍節度鄭州管内觀察處置等使加食邑七百戶仍賜翊衛忠果功臣散官勳封如故主者施行

皇伯祖威德軍節度使榮國公承亮加恩

制

門下朕裸獻廟室燎禋郊丘內蒙祖考之居歆外獲神祇之顧饗嘉我近屬與有陪輔之勞揚於大庭使膺褒顯之福具官某德義自表爵齒兼尊魁然肅艾之材尚矣神靈之胄世承厥慶有跼萼之芬華朝賴以寧若翰蕃之嚴密乃相肆祀實綏思成進加奠食之封申錫詔功之號於戲孝恭可以儀宗室信厚可以化邦人匪時親賢孰朕承翼往肩寵獎尚協榮懷



可

李日尊加恩制

門下朕紹膺駿命稽用上儀祗事郊宮並受三神之福推恩方夏外交四表之歡告于有司錫是在服推誠保節同德守正順化翊戴功臣靜海軍節度觀察處置等使同中書門下平章事李日尊躬懷德善世濟忠勤奠茲南邦居有扞城之效衛我中國使無疆場之虞賜之大將之旄昨之真王之爵往踐厥位知欣戴於寵章來獻其琛用協成於熙事陪敦采邑褒進文階載加真食之封式允懋功之典於戲人之所助惟怙冒於王靈國以永存顧循守於侯度率時新命保乃舊邦可

馮翊郡君連氏等賀 皇帝南郊禮畢表

伏以廟簪蠲烝郊柴昭報仰格神靈之饗俯均夷夏之歡中賀伏惟 皇帝陛下道協欽明德兼神武攬御今之皇策考嚴上之帝儀稜威盛容茂實存乎六世恩典徽數賚并及於萬方妾備數先朝叨榮中禁親逢累洽竊用支欣妾無仕

德妃苗氏上賀 皇帝南郊禮畢表

伏以靈承廟祏祗載郊丘既來萬國之歡遂格三靈之祐中賀恭惟 皇帝陛下徇齊成性睿廣膺期神罔時恫方紹休於大業聖為能饗乃獲考於上儀妾逮侍先朝親逢盛事觀瞻有煒欣賴實多妾無任

賜太子太傅致仕梁適太子太師致仕張



昇特赴闕南郊陪位詔

朕肇稱圭幣祇見郊宮嘉得萬國之歡心以承配天  
之大事永念元老著勳先朝當與辟公序于祠位  
冀能顯相綏我休成可發來赴闕南郊陪位故茲詔  
示想宜知悉

賜允太子太傅致仕梁適陳乞不赴南郊

陪位詔

勅梁適省所上表遞到詔書一道令臣赴闕陪位者  
臣以久病不獲奔走前去事具悉朕肅將圭幣祇見  
郊丘嘉與舊臣協承熙事乃聞疾旅力尚憊優老  
寵賢義誠難強

賜允太子太師致仕張昇不赴南郊陪位

詔

勅張昇郊丘大事群辟具來舊老元勳所宜顯相乃  
以疾苦惻於朕心尚慎興居以膺康福

賜宣徽北院使判大名府王拱辰乞南郊

赴闕不允詔

勅拱辰朕嗣命典神肇稱吉禮稽循故事不敢愆忘  
卿旣率貢職以來助祭又求入覲陪侍郊宮緬彼都  
畿方須鎮撫永惟重寄難徇至懷

賜允守司徒兼檢校太師兼侍中韓琦乞

相州詔

勅韓琦卿以公師之官將相之位統臨四路屏扞一  
方寄重任隆群臣莫比雖罹疾冀即有瘳而章書



頻頻來以病告宗工元老視遇有加恩禮之間然何敢薄重違懇惻姑即便安

賜守司徒兼檢校太師兼侍中判永興軍韓琦再乞相州詔

卿當國家之多難任社稷之至憂實能忠勤以濟勲績方均逸豫適此外虞煩我元功良非得已亦惟體國義不辭勞今雖尚謀經武之時非有蒐兵伐罪之事坐臨諸帥固可優游何必舊邦乃能休養勉綏居息以副倚毗

賜守司徒檢校太師兼侍中韓琦詔

便道之鎮朝廷故常來朝京師朕意所欲使事曲折既當聞知忠言嘉謨又所飢渴雖知勤勤可不勉哉

賜韓琦依所乞詔

勅韓琦奏乞由河陰本路赴相州安泊骨肉行李訖徑乘遞馬赴闕朝見奏事訖還赴本任稍從私便事具悉舊德元功久於方面嘉言讜論所欲亟聞其來造朝然後之鎮義當黽勉無或告勞

賜守司徒檢校太師兼侍中判永興軍韓琦乞相州舊任不允詔三道

勅韓琦卿明德茂勲具書帝籍祖考所付以屏毗朕躬比辭國均已會邊隙故煩元老屬此憂勤今羌雖來柔疆事多弛經營科治改命爲難莫府坐籌制其大略雖聞稍憊冀可少安義有固然朕言無戲

二



勅韓琦羗夷變態未易究知邊塞繕完所宜申飭以  
卿望實分朕顧憂當并羣策以有爲遂措一方於無  
事乃來告疾冀得燕閒主爾忘身忠賢之義勉膺重  
寄務體至懷

三

勅韓琦卿茂德雋功朝廷所賴方解政幾之劇重分  
疆事之憂種落綏和酋渠嚮順永惟邊鎮猶恃老成  
所須經武之遠謀及此暇時而備豫當思體國無却  
告勞

賜守司徒檢校太師兼侍中判永興軍韓  
琦乞致仕不允詔

勅韓琦朕初嗣位不敢暇逸惟畏天命亦惟閔民蠢

茲一方尚戒羗夷制變備豫扞苗禦侮度幾元老克  
協朕心若其憚勤誰與謀此勉祗厥服用副至懷

賜判承興軍韓琦湯藥詔

勅韓琦任隆三事寄重一方比聞經制之勞或爽節  
宣之序特馳使傳往喻朕懷宜有分頒以資衛養

賜允觀文殿學士尚書左僕射新除集禧  
觀使富弼辭免乞判汝州詔

卿翊朕祖考功施于時德善在躬終始如一祠庭置  
使實近闕門邦有大疑慮幾求助忠賢體國義乃可  
留而引喻再三便於出守重違懇惻姑即所安故茲  
詔示想宜知悉

賜判汝州富弼乞致仕不允詔



勅富弼卿忠純亮直爲國元老朕所恃賴急於典刑  
優游小邦足以養疾冀綏福履來副詢謀何必言歸  
以孤眷矚

賜判汝州富弼乞假養疾詔

眷我元老數更悲傷比飭使人往宣至意乃觀來諭  
未即康寧姑順誠懷勉綏吉祿

賜判汝州富弼乞赴安州避災養疾詔

比飭使人具宣至意就令賜告冀遂寧瘳卿嚴祗朕  
命不敢違息顧念吏卒閔其滯留觸熱載馳用忘勤  
勤恭以事上卿實有之仁及賤微又能如此忠誠所  
惻豈獨朕心從容小邦姑以養福勉綏吉祿毋恤後  
艱故茲詔示想宜知悉

賜判汝州富弼赴闕詔二道

勅富弼卿中解政機外分符守久於窮僻衛養或愆  
優游京師可以治疾謂當趣駕以副虛懷

二

勅富弼久解政機存分符守元功茂德朕所注心渴  
聞嘉猷以輔不逮

賜富弼赴闕并茶藥詔

勅富弼適自州藩來還朝位眷馳驅之良苦懼衛養  
之或愆當有寵頒以昭勤佇

賜判汝州富弼辭免南郊禮畢支賜詔

勅富弼省所奏免南郊支賜受釐于神賚及蠻貊卿  
勲德兼茂中外具瞻恩典所加當先羣辟區區一賜



何足以辭當體眷懷共膺貺施

賜宰相曾公亮已下辭南郊賜賚不允詔  
勅公亮等朕初嗣服於祖宗之制未有所改也卿等  
選於黎獻位冠百工或受或辭人用觀政朝廷予奪  
所以馭臣貴賤有差勢如堂陛惟先王之制國用視  
時民數之多寡方今生齒既蕃而賦入又爲不少理  
財之義殆有可思此之不圖而姑務自損祗傷國體  
未協朕心方與勲賢慮其大者區區一賜何足以言  
賜觀文殿學士新除刑部尚書知大名府  
陳升之辭免 恩命不允詔

勅升之設都置守綏御一方付得其材乃能往又卿  
嘉謀美績簡在朕心選於羣臣用有昇屬申明紀律

臨制事幾中外踐更效皆已試勉祗厥服於義爲宜  
賜觀文殿學士刑部尚書知大名府陳升  
之赴闕朝見茶藥詔

勅升之往司官鑰來次郊闈炎敲之序未徂跋涉之  
勤已至當馳榮賜以示眷懷

賜觀文殿學士刑部尚書知亳州歐陽修  
上表奏乞致仕不允詔

勅修股肱名臣與國同體禮當得謝朕尚難之况年  
非告老之時而勲在受遺之籍不留屏輔人謂斯何  
姑體至懷少安厥位

賜知亳州歐陽修陳乞致仕第二表不允  
詔



勅修卿勲德之舊簡在帝心從容一州足以休養而抗奏至於四五必以田里爲歸豈朕視遇故老有不足於禮乎何其求去之果也欲喻至意莫知所言惟能勉留實副勤佇

賜知亳州歐陽修第三表并劄子陳乞致

仕不允詔

勅修省所三上表并劄子奏乞致仕事具悉卿翊戴三朝清明諒直有言有績著在朕心重違勤求外寄藩屏邦之雋老不以遐遺所冀輸誠常存帝室而納祿與職至于再三雖潔身之風可激貪冒顧許國之義未協忠嘉姑體眷懷勉膺圖任所請宜不允

賜觀文殿學士兵部尚書歐陽修辭知青

州不允詔二道

勅修海岱名都太公舊履鎮撫一路朕難其材卿實元勲以忠許國謂當亟往臥以治之冀能優游寧此東土

勅修卿純誠直諒中外所知辭祿就閑志非有激進官治劇義乃無嫌矧茲東州可以居息方之守毫勞逸殆均朕命惟行謂當邁往

賜荅曾公亮詔

昔哉變異以戒人君推之股肱朕所不取元勳舊德實賴交修譴告之來必緣象類明喻朕志使當天心庶幾君臣並受遐福不務出此而果於辭讓是惟保



身豈曰謀國

賜張方平免特支請俸詔

勅方平省所奏劄子陳免特支請俸事具悉卿躬肅艾之材豫辯章之論致喪無貳雖非謀國之時班祿有差是乃養賢之意抗言來諗引義甚明重鑿素懷姑循近制

賜樞密副使右諫議大夫邵亢乞郡詔

勅邵亢卿先帝所命以翊朕躬升執事樞方觀勲效遽欲辭位殆非所宜衛養少愆何憂不已勉共厥服思協朕心

賜皇伯新除彰化軍節度觀察留後安定郡王從式乞免新命不允詔

勅從式卿躬雋乂之材出神明之胄選於宗室則屬近而行尊聞在朝廷又年高而德邵膺茲褒顯人以爲宜勉服官封永綏吉祿

賜涇原路經略使蔡挺茶藥詔

卿方用時材出分帥路適茲寒苦良已勤勞特推撫賜之恩以示眷懷之意

賜天章閣待制知渭州蔡挺獎諭詔

封疆之虞責在將帥厥有績效不忘于心卿久以才稱外分方任乘機踐事能兆厥謀板築告功于疆就募保彼居圉可無後憂倚言若茲朕所嘉歎


賜知唐州光祿卿高賦獎諭詔

召杜南陽世稱循吏其亡久矣朕尚思之卿招懷飢



流墜闢荒梗繕修陂塙績効具昭前人之良何以逮  
此閱奏歎美不忘于心

臨川先生文集卷第四十七



臨川先生文集卷第四十八

內制

詔書

批答

口宣

賜齊恢獎諭詔二道

賜勅獎諭審刑院詳議官大理寺詳斷官等

二道

賜勅獎諭蔡冠卿

賜燕度待罪詔

賜外任臣寮進奉功德疏

賜特放韓贄待罪詔

賜特放傅卞待罪詔

賜答德妃苗氏賀南郊禮畢詔

賜答修儀楊氏等賀南郊禮畢詔



賜大遼賀正旦使副茶藥詔二道

賜大遼皇太后賀正旦使副茶藥詔二道

皇帝問候大遼皇帝皇太后書二道

賜南平王李日尊加恩告勅書

賜溪洞田元宗等進奉勅書

賜占城楊卜尸利律陀般摩提婆勅書

批答文武百寮曾公亮已下上尊號不允

二道

批答曾公亮文彥博等賀壽星見二道

批答富弼

批答不允皇伯祖承亮辭免恩命四道

批答韓絳邵亢陳升之等辭免恩命仍斷

來章二道

宣答文武百寮稱賀宣德門肆赦南郊禮畢

三道

賜皇伯祖王元弼生日口宣

賜皇伯祖承亮加恩口宣

賜皇弟岐王顥生日禮物口宣

賜皇弟高密郡王生日禮物口宣

賜韓琦加恩口宣

賜韓琦生日禮物口宣

賜文彥博生日禮物口宣二道

賜呂公弼生日禮物口宣

賜富弼赴闕茶藥并賜詔口宣二道



賜陳升之赴闕朝見并賜茶藥口宣

賜富弼加恩口宣

撫問韓琦口宣

撫問陳升之兼賜夏藥口宣

撫問鄜延路延州沿邊臣寮口宣二道

撫問河北西路臣寮兼賜夏藥口宣

撫問并伏州路臣寮并將校口宣

撫問高陽關路諸軍口宣

撫問送伴大遼賀正旦人使副口宣

撫問白溝驛賜北朝人使御筵口宣

賜大遼國人使已下生餼口宣

賜大遼國人使瀛州御筵口宣

賜大遼國人使就驛賜酒果口宣

北京賜大遼賀正旦人使御筵口宣

雄州賜大遼人使御筵兼撫問口宣

就驛賜大遼人使酒果口宣

賜真定府路臣寮等初冬衣襖口宣

賜召馮京入院口宣

賜召滕甫入院口宣

賜天章閣待制知審刑院齊恢獎諭詔

勅齊恢省所奏據大理寺日奏司狀四月一日已前

下寺公案並已斷絕無見在事具悉卿以才被選典

領祥刑蔽罪識疑遂無留獄圜空之隆朕庶幾焉閱

奏歎嘉不忘乃績



又賜知審刑院齊恢獎諭詔

勅齊恢犴獄之留易以爲戒卿躬有美行服在近班典茲祥刑致用明慎濟之敏給廷讞用空吏稱厥官朕心所喜

賜勅獎諭審刑院詳議官大理寺詳斷官等

勅趙文昌等省知審刑院齊恢奏據大理寺日奏司狀四月一日已前下寺公案並已斷絕無見在事朕初嗣服德化未孚永念元元多罹犴獄汝等並膺擢任在讞疑能勵厥官以無留事覽奏歎尚不忘于懷

又賜獎諭審刑院詳議官大理寺詳斷官

等

勅趙文昌等四方罪獄常患稽留豈唯呼嗟或以瘦死汝等能勤且敏論讞用單閱奏念勞朕心以喜

賜勅獎諭大理寺少卿蔡冠卿

勅蔡冠卿省知審刑院齊恢奏據大理寺日奏司狀四月一日已前下寺公案並已斷絕無見在天下之獄決於大理汝能審克不蔽厥成來讞之疑遂無留者惟明以敏朕實汝嘉

賜特放諫議大夫知潭州燕度待罪詔

卿受命方隅助宣德化茲凶弗率乃觸大誅引慝自歸謂當譴黜萬方有罪責在朕躬雖爾長民豈專任此



賜外任臣寮進奉功德疏

御方以時材外分邦寄備修禋事來會誕辰廣伽梵之勝緣協華封之善意載惟勤至長用歎嘉

賜特放知成德軍韓贄待罪詔

夫婦相殘政之大恥引愆自効於義爲宜然德化之美厥成在久任斯責者豈特長然

賜特放懷州傅卞待罪詔

勅傅卞先王教民長幼有序厥或不率歸之義刑卿受任方州罪人既得聞斯弗迪引責在躬美俗之成蓋非朝夕一夫抵冒未足以言

賜答德妃苗氏賀南郊禮畢詔

勅德妃苗氏列職內官逮承先帝祀儀獲考慶慰惟均比覽奏陳具昭誠意

賜答修儀楊氏等馮翊郡君連氏等賀南

郊禮畢詔

勅修儀楊氏舊繇德選列職禁闈釐事之成實均慶賴摛文贊喜良慰朕心

賜大遼賀正旦人使茶藥詔

勅卿以膚使之才將善鄰之禮川塗悠遠風氣沍寒永念馳驅當加勞賜

賜大遼賀正旦副使茶藥詔

勅卿夙駕使車遠將信幣方茲寒栗固已勤勞宜申諭於至懷仍就加於寵錫

賜大遼皇太后賀正旦人使茶藥詔



勅卿奉將書幣更涉川途方茲沍寒久於勤勩宜加勞賜以示眷存

賜大遼皇太后賀正旦副使茶藥詔

勅卿將幣造朝方申舊好建壇取道適會邾寒永惟跋涉之勞當有匪頒之寵

皇帝問候大遼皇帝書

嘉生備舍華歲幾終惟素講於鄰權想具膺於時福彌加葆衛永御吉康

皇帝賀大遼皇太后生辰書

玉燭告和方御閉藏之候椒庭集慶載臨誕毓之辰具飭使車肅將禮幣式脩舊好申祝永年

賜南平王李日尊加恩告勅書

勅南平王日尊朕躬執圭幣禮成郊丘無有遠邇並膺休福卿鎮撫南服功昭于時乃眷忠勤尚加褒顯永肩臣節茂對寵章

賜溪洞知蔣州田元宗等進奉助南郊并賀冬賀正勅書

勅田元宗附綏種落葆衛疆陲能來獻琛以贊釐事忠勤之意良有可嘉

賜占城蕃王楊卜尸利律陀般摩提婆勅書

勅卿世荷百祿躬有一邦雖道阻荒遐而志存欽順具書遣使航海獻琛載念忠勤豈忘歎尚因加褒賜式示眷懷



批答文武百寮曾公亮已下上 尊號第一表不允

朕以薄德嗣膺基緒繼天理物常懼弗任方賴文修以熙衆治群公卿士外暨庶黎欲舉鴻名措之躬質臣民歸美爲義則多揣實揆時朕猶不取

批答文武百寮曾公亮已下上 尊號第二表不允

王者奉元以先後天時憲道以始終人事以文制禮作樂以武戡兵豐財以成萬物之性爲仁以得四海之心爲孝惟聖時克朕無能焉被之此名祇有慙德矧家多難創鉅未夷備章而郊欲止不敢因自尊顯良非本懷

批答宰臣曾公亮已下賀壽星見

省表具之乾象粲然官占以告壽祺之應於傳有稽卿等寅亮帝工阜成邦采摛文告慶歸福朕躬書瑞史篇已循故事星隆畧德尚賴交修

批答樞密使文彥博等賀壽星見

省表具之穹旻見象以告壽昌嘉與臣民並膺茲福卿等進繇德選登翊事樞敷奏兆祥請書史策忠嘉之意朕所不忘

批答富弼

卿有憂國愛君之心而忠以忘乎已有經邦信時之業而用未究其能夫蓄久而積博者施之無窮慮深而計熟則謀無不獲此朕所以有望於卿也矧卿正



直不回姦邪素忌小人所異君子所同是以在外十年而左右之譽弗及處躬一德而搢紳之望愈隆朕內度于心外詢于衆自謂有得卿其何辭

批答不允皇伯祖威德軍節度使榮國公承亮辭免 恩命第一表

卿相予祠事既獲休成膺國寵章所宜祇受苟爲謙避未協眷懷

批答不允承亮辭免 恩命第二表仍斷來章

卿位重朝廷望隆宗室駿奔郊廟助朕休成受錫爲宜可無確避

批答不允承亮辭免

省表具之受釐于神人與有慶矧惟近屬德齒兼尊膺此褒嘉於事爲稱往其祇命以副眷懷

批答不允承亮辭免

省表具之古者賑膳之福與同姓共之矧茲大賚外及蠻貊爲吾近屬相協休成恩典所加豈容固避

批答樞密副使韓絳邵亢知樞密院事陳升之等辭免 恩命仍斷來章

省表具之祭有惠術賚及庶黎矧吾政事之臣當在褒揚之首膺斯恩典於體爲宜母或終辭以勤訓告

批答韓絳邵亢陳升之等辭 恩命不允仍斷來章

卿等位爲臣宗躬相祠事膺斯褒顯於體爲宜往服



寵章可無謙避

宣答文武百寮稱賀宣德門肆赦

有制朕升煙泰時登就吉儀駐蹕端門布宣惠澤臣鄰協豫黎庶交欣賴天之休與卿等內外同慶

宣答文武百寮稱賀南郊禮畢

有制朕裸獻清廟燎裡泰壇協相祀儀既嘉勤績族陳賀禮彌見歡誠賴天之休與卿等內外同慶

宣答樞密使以下賀南郊禮畢

有制朕親稱幣玉祗見郊宮能底熙成實繇顯相群靈率籲黎獻交欣朕賴天之休與卿等內外同慶

賜皇伯祖東平郡王允弼生日口宣

有勅卿齒尊德茂屬近位崇惟時獻歲之期實兆元

精之慶當加好賜以助燕私

賜皇伯祖威德軍節度使榮國公承亮加

恩口宣

有勅朕躬率百辟襄封萬靈乃眷親賢實陪大事當懋寵嘉之數以昭褒錫之恩

賜皇弟岐王顯生日禮物口宣

有勅卿地親魯衛德茂聞平方誕毓之嘉辰有匪頌之故事當馳膚使往喻隆恩

賜皇弟高密郡王生日禮物口宣

有勅卿德名方邵爵寵兼崇誕毓之辰甫當穀旦匪頌之禮式示至恩

賜淮南節度使守司徒兼侍中判相州韓



琦加恩口宣

有勅卿位高朝廷德茂百辟相予釐事厥有成勞膺國寵章是為常典

賜判未興軍韓琦生日禮物口宣

有勅卿位重將旄望隆宰席方懋蕃官之績載臨誕毓之辰當有匪頒以昭眷遇

賜樞密使西川節度使守司空兼侍中文

彥博生日差內臣賜羊酒米麵等口宣

有勅卿明謨經國碩望冠朝方茲誕育之辰宜有燕私之禮當加賜賚以示眷懷

賜文彥博生日差男押賜生日禮物口宣

有勅卿才隆國棟位極臣宗惟時盈月之良實兆元

精之慶載臨穀旦當致異恩

賜樞密使呂公弼生日禮物口宣

有勅卿為皇世臣掌國幾命門弧告慶是謂嘉時臺餽致恩式昭厚遇

賜觀文殿大學士尚書左僕射富弼赴闕

茶藥口宣

有勅卿久辭劇位外寄方州惟召節之既嚴想朝旂之甚邇宜頒珍劑以喻至懷

賜觀文殿大學士尚書左僕射富弼湯藥

并賜詔口宣

有勅卿屏翰元功台衡舊德數更悲憂有側朕心因喻至懷宜頒珍劑



賜觀文殿學士刑部尚書知大名府陳升  
之赴闕朝見并賜茶藥口宣

有勅御擁節過都敝關請覲方茲炎溽固已勤勞當  
有匪頒以資輔養

賜觀文殿大學士尚書左僕射判汝州富

弼加恩口宣

有勅御望隆時棟德茂臣宗方茲釐事之成爰有命  
書之賜往膺褒顯當體眷懷

撫問判未興軍韓琦口宣

有勅御內辭鼎軸出撫方垂載惟莅事之勤宜饗蕃  
神之福特申勞問以示眷懷

撫問觀文殿學士陳升之兼賜夏藥口宣

有勅御久采台路方部將符輯瑞之來虛懷以竚宜  
加勞賜式示眷存

撫問鄜延路臣寮口宣

有勅御等並膺廷選外寄邊虞永念撫循備更勞勤  
方茲妍暖宜各寧安

撫問延州沿邊臣寮口宣

有勅御等並因材選外寄邊虞方履盛秋想膺多福  
特申撫喻當體顧懷

撫問河北西路臣寮兼賜夏藥口宣

有勅御等時方鬱蒸氣或疵癘永惟黎獻方寄外憂  
當有分頒以助調養

撫問并代州路臣寮并將校口宣



有勅卿等方以材能外分寄屬當此互寒之極永惟  
勞勤之多當飭使人往宣朕意

撫問高陽關路俵散諸軍特支銀鞋錢并  
傳宣撫問臣寮口宣

有勅卿等各以選掄外膺寄屬比更時序邈在邊防  
永懷扞禦之勞當致拊循之意

撫問送伴大遼賀正旦人使副沿路相逢  
賀大遼皇太后皇帝生辰使副口宣

有勅卿等抗旌出聘擁傳還朝方春尚寒涉道良苦  
當加撫勞以示眷懷

撫問雄州白溝驛賜北朝賀正旦人使御  
筵口宣

有勅卿等並膺朝選實構鄰歡擁節在疆方豫稱觴  
之禮馳輶喻指姑推折俎之恩

賜大遼國賀正旦人使已下生餼口宣

有勅卿等奉將鄰聘來會歲元永懷跋涉之勞宜有  
餼牽之禮式昭勤遇當體誠懷

賜大遼國賀正旦人使却迴瀛州御筵口  
宣

有勅卿等奉將書幣既獲驩成跋涉川途固更勤勤  
宜頒燕衍以示眷懷

賜大遼國賀正旦人使見訖就驛賜酒果  
口宣

有勅卿等奉將鄰聘夙駕使輶既造見於闕庭方即



安於舍館宜加好賜以致誠懷

北京賜大遼賀正旦人使却迴御筵口宣  
有勅卿等奉幣造朝抗旌歸國罔懷使節方次都畿  
特示燕私以將勤遇

雄州賜大遼賀同天節人使却迴御筵兼

撫問口宣

有勅卿等抗旌歸國總轡在疆方茲炎歊亦旣勤勤  
就頒燕衍式示眷懷

就驛賜大遼賀同天節人使却迴朝辭訖  
酒果口宣

有勅卿等奉將聘禮來會誕期惟鄰好之踐脩嘉使  
容之飭備當申頒賚以侑燕私

賜真定府路臣寮等初冬衣襖口宣

有勅卿等水澤將堅風颯載厲永懷黎獻方寄外憂  
當飭使輶就頒篋服

賜召學士馮京入院口宣

有勅卿文備國華學該世務祥琴旣御吉服以朝宜  
復禁塗往供辭職

賜召滕甫入院口宣

有勅卿夙稱才敏久擅文華當解風憲之嚴以豫論  
思之密

臨川先生文集卷第四十八



臨川先生文集卷第四十九

外制

召試三道

節度使加宣徽使制

翰林學士除三司使制

誠勵諸道轉運使經畫財利寬恤民力制

皇姪宗實可起復舊官知宗正寺制

皇姪知宗正寺宗實可岳州刺史充本州團

練使制

司馬光知制誥制

司馬光改天章閣待制制

馮京權知開封府制



范鎮加修撰制

趙抃兼侍御史知雜事制

韓績改殿中侍御史制

沈立李大臨朱壽隆可三司戶部度支鹽鐵

判官制三道

李壽朋陸經張洞開封府推官制三道

王陶皇子伴讀制

施昌言知渭州沈邁知杭州李允知鄧州制

三道

李東之判西京留守司御史臺制

王綽知徐州鞠真卿知壽州何郊知永興軍

潘夙知桂州制四道

余靖司馬光張瓌加恩制三道

賈黯蔡襄王珪范鎮馮京余靖李東之轉官

加勲邑食邑制七道

呂公弼工部侍郎制

司馬光禮部郎中制

周沆右諫議大夫制

沈邁起居舍人制

掌禹錫趙良規並祕書監制

王綽祕書少監制

李丕緒少府監制

宋任呂公孺馬從先解賓王並太常少卿制

三道



召試三道

節度使加宣徽使制

門下推轂授師擁旄乘塞擅生殺之柄于外繫安危之體于中厥有顯庸宜膺寵數誕揚孚號明示庶工具官某學足以通大方謀足以斷衆事有經天之業有扞城之材比以明揚屢更煩使遂躋膺仕良副訃謨維塞路之要藩實兵防之重寄職爾鎮撫紆予顧憂蓋爵賞之加不遺於近小豈藩維之任顧可以弭忘用是疇其展采之勞寵以宣猷之號繁人謀之衆允匪朕志之汝私夫任重者其憂不可以不深位高者其責不可以不厚號名之美禮秩之崇非期假寵以擅榮茲用論功而取稱矧夫守國之圍謀王之師聯輔相之籍於殿中居士民之瞻於天下其思祇慎以副褒優可

翰林學士除三司使制

勅三司使天下之盛選也自尚書六官名存實去而三司之職事所總居多則非夫仁明肅艾足以輔世濟物者奚宜任此哉具官某有疏通之才有直亮之操閱言崇議足以經綸王家高文典策足以鼓動當世遂以人望揚于禁林若夫施政之後先生財之本末蓋嘗深思而孰講殫見而洽聞則居天下之盛選主朝廷之大計詢考在位孰如汝宜夫聚天下之衆者莫如財理天下之財者莫如法守天下之法者莫如吏維予任汝其聽勿疑法之不善者汝得以議而



更吏之不良者汝得以察而去則夫調度之不時費出之無常邦用之不給元元困於征求而愁怨於下者直汝之恥也夫行已有恥而後可以爲士矧吾左右信任詢謀所同而觀聽之所在者乎往祗厥官其亡以寵利而爲士恥可

誠勵諸道轉運使經畫財利寬恤民力制夫閔仁百姓而無奪其時無侵其財無耗其力使其無憾於衣食而有以養生喪死此禮義廉恥之所興而二帝三王誠勅百工諸侯之所先後世不可以忽者也朕夙興夜寐聽治不怠園游宮室之觀無所增飾而躬以節儉先天下之士然而不忍人之政考諸先王未有以及之也凶年飢歲民之父子夫婦猶有

不得保其家室而放乎溝壑意者吏或不良不知所以賑救省憂之方而使之至此耶今吾別諸道置使者使得察吏之良否而視民之疾苦輒具以言而任事者或不惟朕志之所急而以侵牟之爲故甚非所以遣使者慰安元元之意也夫轉輸天下之財以給有司之費皆有常數而無橫求誠能御輕重斂散之權而禁因緣之姦則何患乎經入之不足彼前世良吏能紓其民而官事亦不耗廢者豈有他哉亦在乎勉之而已若乃操聚斂之贏以爲功而不知百姓與足之義非惟逆於朕志而有司考績之法亦將不汝容焉朕言維服其聽母怠可

皇姪右衛大將軍岳州團練使宗實可起



復舊官泰州防禦使知宗正寺制

勅先王糾合宗族而分職以治之所以嚴宗廟也宗廟嚴則禮俗成而天下治其事豈可以輕哉今朕選於近屬以修宗正之官亦先王治親之意也以爾具官某惠仁孝恭忠信純篤故遷厥位以稱禦侮之實而使任事焉夫士之欲施於政未有不學而能者學所以修身也身修則無不治矣朕言維服爾往懋哉

皇姪右衛大將軍泰州防禦使知宗正寺

宗實可岳州刺史充本州團練使制

勅孝子之思慕無窮而送終有既者先王之禮也具官某祗慎克孝能良於喪去位家居三年於此矣其

還位號復序內朝朕命維新往欽無斁可

起居舍人直祕閣同修起居注司馬光知

制誥制

勅先王誥命之文何其雅馴而奧美雖出命非有司之事而討論潤色蓋有助焉以爾具官某操行修潔博知經術庶乎能以所學施於訓辭俾掌贊書往諧朕志可

起居舍人直祕閣同修起居注司馬光改

天章閣待制制

勅楊雄曰周之士也貴秦之士也賤周之士也肆秦之士也拘蓋先王以禮讓爲國士之有爲有守得伸其志而在上不敢以勢加焉朕率是道以君多士以



爾具官某文學行治有稱于時故明試以言使司告命而乃固執辭讓至于八九改序厥職以伸爾志是亦高選往其懋哉可

翰林侍讀學士右正言馮京改翰林學士知制誥權知開封府制

勅學士職親地顯而開封典治京師非夫忠厚仁恕而有文學政事之能孰可以任此具官某造行直方受材博敏踐更中外休顯有稱論思禁林尹正畿甸詢謀惟允其往懋哉可

范鎮加修撰制

勅昔周人藏上古之書以爲大訓而孔子春秋天子之事也蓋夫討論一代之善惡而撰次以法度之文

章非夫通儒達才有識足以知先王不欺足以信後世則孰能託尚書春秋之義勒成大典而稱吾屬任之指乎以爾具官某有該通之材有純潔之操辯論深博溢於文辭論思禁林時議惟允則夫案善惡見聞之實斷是非去取之疑人之所難宜以命爾爾其精思熟考自勉以古之良史毋襲近世比事屬辭之失使來者無所考稽可

右司諫趙抃禮部員外郎兼侍御史知雜事制

勅某朕置御史以爲耳目非更事久而能自稱職則不以知雜事也以爾嘗任言責有猷有爲行義之修士人所譽故遷郎位使在此官悉其誠心迪上視聽



義之與比時乃顯哉可

屯田員外郎韓績改殿中侍御史制

勅其朕使學士五人舉二人以爲御史又於二人擇取一人而以汝爲之汝名臣之子世載榮問愷悌忠信學知大方無蔽于儉人無撓于大吏無迪上以非先王之典而同乎流俗時汝稱職往其勉哉可

兵部郎中沈立可依前官充三司戶部判

官制

勅其擅一道之財而開闢斂散之以給縣官之費而又察舉吏士之賢不肖問民之疾苦與夫入佐三司而四方之言利者必稽焉其職事之責等爾汝以才能屢試而行義加修使于東南歲月久矣還禪掌計之治所以慰將命之勞惟爾博學多聞固嘗知夫百姓與足之義古人有言曰尊其所聞則高明行其所知則光大矣可不勉哉可

度支員外郎充祕閣校理李大臨三司度

支判官制

勅其天下之食貨皆領於三司故朕常難於置使而又考慎其屬以稱之爾以文學爲官而政事嘗有所試清明敏達可使治煩往踐厥官其知所守矣可

金部郎中朱壽隆三司鹽鐵判官制

勅其取於山海之無窮以助縣官之不給所以開闢斂散之不可以無術也非夫廉辨敏明之吏孰能任此者乎爾純行美材久於煩使往共厥服維是勉哉



可

度支員外郎李壽朋開封府推官制

勅某朕布大慶於天下惟士之有能有為而不獲盡者豈一日而忘哉爾以政事之材而濟之文學無所避憚以修厥官陷于吏議失職久矣尹正畿甸四方所瞻姑往佐之以永民譽可

殿中丞充集賢校理陸經開封府推官制

勅某天下無事休養生息百年於此而京師之人衆矣獨開封以一尹治之故朕常慎擇材士以為之佐庶幾乎其不勞而治也爾材茂質美久於湮阨而智能彌劭行義加修姑使治煩往其自勉可

太常博士充祕閣校理張洞開封府推官

制

勅某開封任重事叢故常擇才士以為之佐爾以文章學問列職校讎出試一州風績彌劭膺此遴選往其勉哉可

左司諫王陶皇子伴讀制

勅某自天子至於士未有不待學而成者今朕欲進諸子於學求可與居者而大臣以爾為言爾久在諫工有聞於世茲惟慎選可不勉哉可

樞密直學士施昌言知渭州制

勅夫出河祕文中嚴於禁閣臨渭分閫外肅於戎亭進陪侍從之聯往膺經略之寄茲為異數授受惟艱具官施某才劭兼人問望映世早據素蘊寢階清塗



南榻計庭裨贊之功可紀西廂樞府論思之効尤彰  
洎出總於藩條且屢制於邊瑣事經畢舉政績用成  
宜易餘杭之符就撫氏羌之塞爾其坐護諸將善固  
吾圉而今而後無西顧之憂者繫爾之力可不勉哉  
可

知制誥沈邁知杭州制

勅東南奧區杭越重鎮眷惟師帥之選屬于侍從之  
良宜有褒優式示毗倚具官某風姿爽拔器宇閑深  
早登高妙之科亟躋通顯之列校文東觀典學擅平  
多聞演誥西垣英辭鼓乎群動比抗章而請郡期調  
膳以奉親曾未暮年已聞報政乃就更於淮海庶益  
便於庭闈載念錢塘之邦方虛銅虎之守宜共易  
之命仍選應宿之資服我新恩寵爾故里與夫引會  
稽之紱又相萬也爾惟懋哉可

龍圖閣直學士知河陽李允給事中依前  
龍圖閣直學士知鄧州制

勅鄧於京西爲一都會提兵以守常擇大吏且有加  
命寵榮其行具官某寬和靜深方厚篤實嘗由御史  
遂爲諫官延閣侍從之班方維帥守之任焯有績效  
見於事爲序于東省之華寄以南陽之重按撫吏士  
治軍牧民敷宣詔條鎮靖風俗繁汝能力往其勉哉可

龍圖閣直學士李東之刑部侍郎充集賢  
院學士判西京留守司御史臺制

勅古之仕者難進易退陵夷至於後世而禮義廉恥



幾乎息恬於勢利者鮮矣而苟得躁進者不乏於朝  
教之未孚朕甚患之顧吾左右親近之臣行義合於  
古之仕者宜從其志使在位之貪者有愧而慕焉具  
官其名臣之子能自修敕出備蕃維之任入爲侍從  
之官而乃力辭顯榮退就閑職別都執憲地清務簡  
特峻秋官之秩仍通麗正之班吾惟爾嘉其往居息  
可

知雜王綽吏部郎中直龍圖閣知徐州制

勅某知雜御史於朝廷之士爲高選非精明彊直不  
能稱其任也爾更踐多矣有聞於時故從遠方召置  
此位乃以病告至于再三出臨大州進直嚴閣又增  
郎位以寵爾行其亦懋哉往共厥服可

集賢校理鞠真卿可光祿寺丞依舊充集

賢校理知壽州制

勅某付之千里之地能禁暴去悍拊循鰥寡使良民  
有以休息而吏不敢爲侵冤豈非所謂能者哉若爾  
之材歷選于朝而久試于外固時之所謂能者朕所  
加省而不忘今未壽劇郡也故徙汝以治之而稽汝  
歲功當得遷位丞于光祿其往勉哉可

何鄭知永興軍制

勅朕初即位慎考俊乂之臣付之方鎮具官某廉清  
質直敦大詳敏藝文之學政事之材左右具宜以有  
聲績作國西屏雍維大都鎮撫一方老成是賴序遷  
厥位往牧其人其勸猷爲以膺任屬可



潘夙轉官知桂州制

勅某挂於西南爲一都會蠻夷荒忽鎮撫有宜故於用人常慎其選爾清明敏達寬博惠和更事有功簡在朝論遷序即位往其勉哉可

尚書左丞余靖制

勅朕有大賚雖疏逃微細必加焉況於位序高任屬重寵章徽數其可略乎具官某政事之材藝文之學踐更中外光顯有聲濟登大官鎮撫荒服能率厥職相時休成行食序勲往其祇服可

天章閣待制司馬光制

勅陟降左右司朕躬之闕者至親篤信之臣也邦有大賚其可以後而忘乎具官某政事藝文操行之美有聞於世簡在朕心相時明裡庀事惟謹進階序爵其往懋哉可

尚書戶部郎中知制誥張瓌制

勅朕宗祀先帝以配昊天而均福釐於在位疏遠微賤無遺者矣又況於侍從之臣乎具官某德厚資深志方行潔安於義命爲世寶臣考慎樂禮相時大事進階序爵其往懋哉可

翰林學士知制誥賈黯轉官加勲邑制

勅朕初即位奉行先帝故事不敢有廢也具官某剛毅篤實閎深博敏先帝所遺以論思左右者也其遷厥位加賜恩典其往欽哉可

翰林學士知制誥權三司使蔡襄轉官加



食邑制

勅朕祇若先帝之初大賚以勞天下職親地禁之臣皆先帝所遺以助朕者也其可以後而忘哉具官某率德秉義以綏寵祿主國大計功昭于時班命有章往欽無斃可

翰林學士兼侍讀學士知制誥充史館修撰王珪轉官加食邑制

先帝投天下之艱以屬朕身永惟所與濟此者豈非左右之良哉具官某秉哲迪義士民所望論思潤色有補於時大賚之恩外通四海況於親近豈可以忘往服寵章愈其慎哉可

翰林學士知制誥充史館修撰范鎮轉官

加勲邑制

勅朕雖哀恫永惟付託之重不敢忘先帝寵綏海內褒厚羣臣之意具官某敦大閱博清明敏達職親地密為國信臣遷序位等申之恩典惟慎厥服往膺顯榮可

翰林學士知制誥權知開封府馮京轉官

加勲邑制

先帝以盛德成功克終天祿眇然在疚永念嗣訓非左右之良孰與濟此哉具官某秉哲蹈義士民所望尹正京邑善聲流聞邦有大賚當由貴始往膺榮祿無替厥修可

集賢院學士余靖轉官加勲邑制



先帝君臨天下餘四十年功德之所及博矣非文武之士協力中外何以致此哉在後之侗纂修成法敢忘大賚以勞衆工具官某敦大閱深清明敏達蕃屏帝室厥功茂焉恩典寵章往其欽服可

集賢院學士李東之轉官加勲邑制

先帝棄天下不及班命以勞羣臣朕繼大統其承厥志具官某廉靜忠恕濟以詳敏能紹世美爲時名臣膺服寵章往其思勵可

龍圖閣直學士給事中呂公弼改工部侍郎制

勅褒德序功制爲祿位先帝所以熙庶政也朕雖在疚所不敢忘具官某保身慎行舊有榮聞陟降左右是爲世臣惠綏西南風績尤顯冬官之貳其往欽哉可

待制司馬光禮部郎中制

勅左右侍從之臣皆先帝所遺以助興政理者也  
有勞可錄朕敢忘哉具官某行義信於朝廷文學稱於天下比更任使會課當遷進位二等以嘉爾績爾方以經術入侍而又兼諫爭之官往其思致厥身使朕之聰明無所不通爾亦維有無窮之聞可

周沆右諫議大夫制

勅堯舜黜陟幽明之法其詳不見於經蓋其考績之次序必始於朝廷之貴者朕率是道進退百官故於邇臣無有私德以爾具官某忠厚謹潔惠和寬博嘗



被方維之重任久參侍從之要官內外之勞皆宜有賞而以稱士失實控于吏議為郎武部七歲于茲著論積功進位西省夫職在盡規之地官又以諫為稱維是將明往其思勉可

右正言知制誥知越州沈邁起居舍人制勅列名侍從分職方維厥有庸勲朕其甄序具官其端良足以有守精敏足以有謀為時寶臣典掌明命出撫州部治聲流聞內外之勞進遷惟允序官二等以懋厥勤是謂寵榮往其祗服可

掌禹錫趙良規並祕書監制

勅祕書圖籍藝文之府而置監在光祿衛尉諸卿之右其材實德望當有以稱之以爾具官某等歷官茲多服采惟謹序于卿位簡在朝廷宣布詔條討論典故久於任使亦各有勞宜推增秩之恩以信懋功之法往從官次無或不祗可

王綽祕書少監制

勅朕初嗣位大賜天下文武在位各以序遷具官某出入踐更名聞休顯奉常之副用勞厥勤乃辭官榮以避親諱綏予孝子改貳祕書往服寵章靖共無斁可

光祿少卿李丕緒少府監制

勅少府古官於朝廷之位尊顯矣具官某行義祗飭材能敏達外更器使績用每成有司以聞又當增位往膺秩物無怠厥修可



司封郎中宋任太常少卿制

勅士以序遷至於卿位亦榮矣非才智有以任事行義有以保身豈能致此具官某中外踐更久於郎選明習衆事見稱於時往即厥官勉之無斁可

江南西路轉運使呂公孺太常少卿制

勅某太常兼夔與伯夷之事非夫藝實德望有以過人孰宜爲之貳也爾名相之子以才見稱出入踐更休有風績序遷厥位其往欽承可

職方郎中通判太原府馬從先太常少卿

制

勅某太常禮秩異於諸卿非文學入官則不得爲其貳也以爾行治之美才能之敏踐更多矣皆有可稱

會課于朝躋登此位往來自稱惟既厥心可

解賓王太常少卿制

勅某今之太常兼夔與伯夷之官非夫寅恭清明博習於禮樂則孰能爲之貳也今朕考行序勞而以爾爲貳於太常維爾嘗以材稱而屢更任使雖身在外而名位亦云顯矣所以稱此者可無勉哉可

臨川先生文集卷第四十九



臨川先生文集卷第五

外制

三司鹽鐵副使陳述古衛尉少卿制

郭永光祿少卿制

林億司封薛求司勳郎中制二道

齊恢度支張景憲金部郎中制二道

陳述古司封郎中趙抃戶部員外郎張燾刑

部郎中制三道

朱處約孫抗孫琳並祠部郎中制三道

王陶杜千能祠部張燾兵部郎中制三道

苗振職方王舉元刑部郎中制二道

王綽刑部郎中制



胡況周燮都官宋孝孫比部郎中制三道

錢暄比部王繹工部郎中制二道

李章周延雋竇綱十紳朱從道晁仲綽鄭隨

並屯田郎中制七道

杜訢屯田員外郎制

薛仲孺虞部郎中制

楚建中邢夢臣王昇張師顏晏成裕並司封

員外郎制五道

蔡抗度支員外郎制

蘇寀王益柔並兵部員外郎制二道

錢公輔祠部員外郎朱延世虞部鄭伸駕部

員外郎制三道

許遵陳汝羲章俞韓繹劉牧王易知並職方

員外郎制六道

謝景初何世昌陳安道晁仲約唐諲林大年

並都官員外郎制六道

胥元衡李處厚並屯田員外郎制三道

呂元規可駕部員外郎制

吳充劉敞轉官制二道

劉覺等轉員外郎制

王伯恭王允李正臣劉叔寶轉官制四道

三司鹽鐵副使陳述古衛尉少卿制

勅某考課黜陟之法雖踈逃未嘗不信又況於近而顯者乎具官某以才自奮能世其家出入踐更休有



風績列卿之貳其往勉哉可

郭永可光祿少卿制

勅其外廷之位能至於九列者少矣具官某踐更衆職功善自昭年除歲遷以致卿位進寵一等往承惟休可

林億司封郎中制

勅其朕有官祿慶賞以序功而其施始於朝廷之近爾以藝文被選而多所踐更通籍禁中庀官闕下序遷郎位既極左曹往即寵榮愈其勵勉可

薛求司勳郎中制

勅其朕布大號在廷文武之士皆得進官一等而伐閱當遷者又各得以序遷爾中外踐更以才自顯膺

此恩典往其勵哉可

權提點成都府路刑獄齊恢度支郎中制

勅其朝廷選實才臣以使諸路而察庶獄之不辜厥有庸勳朕當甄序爾才能行義士論所稱會課有司實應遷法往膺休顯其愈懋哉可

淮南轉運副使張景憲金部郎中制

勅其入佐三司出使諸路皆朝士大夫之高選有勞當錄其可忘哉爾行義之修才能之邵見稱當世簡在朝廷會課進官往其欽服可

三司鹽鐵副使陳述古朝奉大夫司封郎

中三司度支副使趙抃戶部員外郎加上

輕車都尉權三司戶部副使張燾朝散大



夫刑部郎中制

勅某人等朕初嗣位奉行先帝故事不敢有廢也具官某等行義稱於世才能見於朝佐國大計為功多矣序遷位等其往欽哉可

朱處約祠部郎中制

勅其爾嘗為御史持論不阿出守方州稍遷使任序功增秩邦法有常往懋厥修以須進選可

孫抗孫琳祠部郎中制

勅其人等都水之官廢久矣朕修之而用爾為丞爾維才能懋建厥事有司論課當以時遷進序名曹往祇無斃可

提點福建路諸州刑獄公事王陶祠部郎

中制

勅其朕選置使者清明于諸路所以待之非輕也爾踐更衆矣才美有稱備在遠方能修其職進遷位等往愈懋哉可

權提點廣南西路刑獄杜千能祠部郎中制

勅其朕初即位羣臣朝者皆增位一等有功當遷又皆得以序進爾材諳行治見稱於衆奉使于外治聲流聞會課進官往其祇服可

三司戶部副使張燾兵部郎中制

勅其考績三歲進官一等先帝所以勵羣臣也具官某秉哲迪義有聲于時能勵厥修以宜官政序功



增位其往欽承可

苗振職方郎中制

勅某尚書郎中序列五品其於朝廷之位亦已顯矣爾用選擢嘗更任使積功久次得在此位所居三歲宜進一官至今而後得遷乃以爾嘗有謫朕於黜陟豈苟然哉自爾取之而已往思自勉以稱褒升可

王舉元刑部郎中制

勅某薦非其人而與其罰古之道也爾以才實外更任使風績之邵靡人不稱而任舉有失法當坐免雖更教令猶褫一官以懲上報之稽而塞人言之衆膺踐厥服往其勉哉可

侍御史知雜事判都水監王綽刑部郎中

制

勅某御史皆吾耳目之官而折百工以法刑之中者也考其功狀在法當遷則吾豈可以忘哉以爾具官某忠厚諒直有稱於世踐更衆職皆以能聞故寘之臺中位次執法名實之善允于人言姑疇積功序進一等位亦顯矣往其勉哉可

胡況都官郎中制

勅某爾以才行自昭于時外分將符內序郎位致勤厥職三歲于茲稽狀有司法當增位進遷一等其往懋哉可

周燮都官郎中制

勅某褒善錄勤邦有常法爾以才能行義登顯朝廷



序正郎位三年於此矣進遷一等以懋厥勤勵治我民乃其能稱可

宋孝孫比部郎中制

勅某褒功錄善邦法有常爾共厥官服采惟謹久於郎選會課當遷愈其勉哉以稱新命可

監在京都鹽院錢暄比部郎中制

勅某古者官有職而命有數非有職不足以序群才非有數不足以差衆功今官有品猶古之命數也命之數自一推而上之至于九官之品自九推而上之至於一大略蓋無以異而其詳如此不同唯其欲得賢者之在位則古今一也爾以才能行治進序於朝年除歲授既得列於五品久於職事法又當遷其亦可謂寵榮光顯矣其思自勉以稱吾欲得賢者在位之意哉可

三司戶部判官充祕閣校理王繹工部郎

中制

勅某三司理財之吏與館閣校文之官皆朝廷雋乂之選也其於進秩有異數焉爾以藝文世家而祇慎謹飭久在此位有勞當遷序于名曹其往思稱可

李章屯田郎中制

勅某褒善錄勤朝廷之政爾才能行治比見推稱會考績之法當增位序進遷一等其往懋哉可

周延雋屯田郎中制

勅某郎中五品而司田以待藝文之士爾大臣之子



強學瞻辭出典一州序功當進往祇厥位其克懋哉  
可

職方貞外郎竇綱可屯田郎中制

勅某漢明不以郎官假貴戚以出宰百里為不可以  
非其人今之郎選其重非漢比也而郎中序于五品  
其授豈可以輕哉爾以文藝起家以吏能從政序遷  
此位嘉寵爾勞往服訓辭勉求報稱可

職方貞外郎卜伸可屯田郎中制

勅某郎中序列三等其品皆為第五非積功久次則  
不得至焉爾以文藝入官而濟之謹潔久於任使當  
得進遷茲維爾階其往祇服可

職方貞外郎朱從道可屯田郎中制

勅某尚書郎選於今為重而郎中列于五品爾精敏  
強果號為才臣積功累勤以致此位往共厥服其愈  
懋哉可

晁仲綽鄭隨可屯田郎中制

勅某郎中序列五品非久於任使有勞而無罰則罕  
得至焉爾以文藝起家以才能為吏稱功累善當得  
進遷往其懋哉思稱新命可

太常博士權御史臺推官杜訢可屯田貞

外郎制

勅某尚書郎位吾所量也爾名臣之子行義修飭才  
能有譽而職事無過審官稽狀當以時遷新命維休  
往其祇服可



駕部員外郎薛仲孺可虞部郎中制

勅某郎中五品於朝廷為顯位爾悉心為吏才敏見稱嘗所踐更咸有功最進遷惟允其往懋哉可

提刑楚建中可司封員外郎制

勅某朕置使者以察天下之獄其選擇甚難而視遇之甚厚序功錄善其可忘乎爾行治才能有聲於世服官惟稱會課當遷以懋爾勞往其祇訓可

侍御史邢夢臣可司封員外郎制

勅某侍御史於御史之選為高而尚書郎以司封為前列爾才能行義嘗見推稱於有言職為一臺高選任責未久序勞當遷往副司封愈其自勉可

都官員外郎充祕閣校理王昇可司封員

外郎制

勅某爾以藝文高第進仕朝廷廉靖謹良有稱於世校文祕閣典事方州甄序歲勞進遷惟允往共厥服其愈懋哉可

權梓州路提刑都官員外郎張師顏可司

封員外郎制

勅某爾修潔精敏達於從政嘗更任使皆以十稱故以一路之庶獄寄之督察方行就事會課當遷往懋厥修以求稱職可

度支員外郎充崇文院檢討晏成裕可司

封員外郎制

勅某爾以文藝之學在討論之官丞于太常典掌禮



樂有勞可錄其以序遷於世大家爾為能保往思淑  
慎無廢厥勤可

祠部直外郎充祕閣校理蔡抗可度支員

外郎制

勅其序功錄最邦法有常惟敏厥修乃能自稱爾以  
校讎之選受吾蕃屏之寄材能行治見譽於時而會  
課有司番遷厥位官無虛授往可勉哉可

權利州路轉運使度支員外郎蘇案可兵

部員外郎制

勅其朕欲明清于吏民而擇使以涖之非特使之轉  
貨財以贍有司而已也爾彊敏謹潔達於從政往充  
其選克有成勞序進一官愈祇乃服可

三司鹽鐵判官度支員外郎集賢校理王

益柔可兵部員外郎制

勅其任賢使能而繼之以黜陟先王之所以治未有  
改此者也爾惟賢故序于校讎之職爾惟能故列于  
會計之官稽狀有司法當增位其遷一等以懋爾勞  
可

太常博士充集賢校理同脩起居注判三

司度支句院錢公輔可祠部員外郎制

勅其序功黜陟邦法有常爾文章博美行義純潔施  
於政事又以材稱會課進遷蓋維常法往祇厥位其  
亦懋哉可

國子博士朱延世可虞部員外郎制



勅其尚書虞部掌天下之山澤而脩其時禁郎官職事雖廢而官名猶貴於時非歷試而有勞即不得以此位若爾之潔廉畏慎蓋知所以自保矣其愈懋哉可

比部員外郎鄭伸可駕部員外郎制

勅其爾勤敏謹潔以脩厥官會課有司當得遷位司輿之副其往懋哉可

都官員外郎許遵可職方員外郎制

勅其爾進以藝文而兼通律令之學故於為吏常以才稱第課有司當得進位祇予新命厥往懋哉可

都官員外郎陳汝羲可職方員外郎制

勅其審官之法吏有勞而無罪至於三歲則遷位一

等亦所以勸也爾文學政事有稱於世久更任使會課當遷往服寵章愈其思勵可

都官員外郎章俞可職方員外郎制

勅其爾以藝文之學政事之材所更滋多皆有善最三載考績法當進遷往踐厥官愈其思勉可

韓繹可職方員外郎制

勅其三歲一遷審官馭吏之常法也然非智謀忠力能舉其職事者亦何以稱此哉爾績德善之慶而以藝文自奮施於吏政強敏有聲膺此寵榮其知勉矣可

都官員外郎劉牧可職方員外郎制

勅其朕置使者以察諸路而選才士以佐之爾行義



智能比見稱述往其職事會課當遷懋勉厥勤以稱  
官使可

都官貞外郎王易知可職方貞外郎制

勅某爾久於試用常以才稱出守一州可有爲矣而  
有司會錄當得進官往旣厥心以抵予訓可

屯田貞外郎謝景初可都官貞外郎制

勅某周官司士三歲則稽士任進其爵祿而方今審  
官之法用焉爾名臣之子操行修潔文學政事有稱  
於時審官序勞當以時進往踐爾位厥維懋哉可

屯田貞外郎何世昌可都官貞外郎制

勅某尚書之實多廢矣而郎位尚爲朝廷所重爾藝  
文操行政事之材推舉進遷以至於此出佐州治論

功應條政序中行往其祗服可

屯田貞外郎陳安道可都官貞外郎制

勅某士夫奉法循理以共厥服至於三歲而無咎罰  
其可無進遷之法以慰勉之哉爾藝文起家而行義  
脩飭比更器使實以才稱往服寵章愈其思勉可

屯田貞外郎晁仲約可都官貞外郎制

勅某褒善錄勤朝廷之政爾清明敏達士類所稱典  
治一州風政彌劭有司序績當得進遷往服寵章愈  
其思勉可

屯田貞外郎唐謹可都官貞外郎制

勅某爾藝文行治進有可稱爲郎尚書三年於此矣  
職事之最法當進遷愈其懋功以對新命可



屯田員外郎林大年可都官員外郎制

勅某士之有為者豈必慶賞而後勸哉然黜陟者勵世之通法而為天下者所不能廢也爾被文蓄德從政有聲會課當遷序官一列往其勵勉膺此寵榮可  
太常博士胥元衡可屯田員外郎制  
勅某仕於朝廷者有勞而無罪至於三歲則遷位一等所以明有勸也爾名臣之世行義脩飭以才自奮從政有稱往服寵章愈其思勉可

太常博士李處厚可屯田員外郎制

勅某爾政事之材藝文之學潔身慎行皆以有稱試請利權是亦煩使序功錄最當得進遷列職南宮往其祗服可

比部員外郎呂元規可駕部員外郎制

勅某褒善錄勤邦有常法爾護軍糴將邊漕悉心營職才諳見稱會課序遷往其祗服可

吳充轉官制

勅某士之好德樂善而無求則爵賞有不足以勸焉而爵賞固不廢乎無求之士爾文章行義政事之實士友之所服朝廷之所稱然方試爾于外以觀爾為而審官上爾歲月之勞法當遷位一等此雖不足以為爾勸而天下至公之法不可以廢者也往其懋承之哉可

劉敞轉官制

勅某褒善錄最朝廷至公况吾邇臣在法當陟具官



某文章博美政事詳敏心通道德之意躬率仁義之行久於侍從實允詢謀付以方維又能鎮撫甄序乃績進遷厥官朕命惟休往其祇服可

劉覺等轉貢外郎制

勅某官所以制祿位之等職所以叙才分之宜視職之廢舉與行之失得而下上其官此吾為天下立法以廢置賞誅之大體也爾持其行而無失修其職而無廢三年於此矣不可以徒置也宜有賞焉序進一官往欽乃服可

王伯恭轉官制

勅某方今仕於朝廷者率三歲而一遷論者患其不足以勸功然日月久矣能祇慎不息免於罪悔則亦宜有以褒嘉此朕所以使爾得遷之意也士之為義蓋有常心何必利焉然後知勸可

王允轉官制

勅某爾能誦先王之言以得祿位施於有政又以才稱丞于殿中歲月久矣博士之選儒者所宜以為爾官其往祇載可

李正臣轉官制

勅某書曰欽哉欽哉惟刑之恤哉此吾所以建審刑之職而擇取智能之士以為詳議之官爾以藝文起家又能明習法令靖共厥位有伐當遷姑使序于太常而仍其覆讞之事往為審克以稱欽恤之意可

劉叔寶轉官制



勅某士之修身慎行宣力四方豈皆以取爵祿之報哉蓋其志有以謂義當如此然而爵祿必稽行治勞烈而加焉今吾序進爾官以有積功之實義不可以無報也在爾自爲則欲知夫義當如此而無志乎寵利然後可以事君往其勉哉尚有終譽可

臨川先生文集卷第五十

臨川先生文集卷第五十一

外制

周革轉官任逾等加勳制二道

張慎修徐師回等改官制二道

磨勘轉官制二道

明堂宗室加恩制

皇姪孫世永改隴州防禦使皇姪從古登州

防禦使皇姪曾孫令磋右千牛衛大將

軍制三道

鄭穆錢袞周豫楊南仲姚原道晏崇讓劉温

並太常博士制七道

柴餘慶國子博士制



邵元太常丞制

蔡說晁仲熙王元甫並殿中丞制三道

高應之國子博士張侔太常丞范襄胡掖殿

中丞制二道

王介毛雋許懋傳顏陳舜俞句士良並祕書

丞制五道

商傳張璘王岫王侗並光祿寺丞制四道

郎几孫琪衛尉寺丞張次元並大理評事制

二道

柴元謹陳巨卿並衛尉寺丞孫琬大理寺丞

制二道

張服尹忠恕張慎言孫昱薛昌弼雷宋臣太

子中舍劉師旦殿中丞制二道

方蘋高安世張湜傳充黃汾王塾並太子中

舍制三道

王申等太子中允雷宋臣太子洗馬制二道

熊本高旦孫思恭並著作佐郎制三道

王廣廉孫覺姚闢遊烈張公庠高膚敏崇大

年潘及甫阮邈並著作佐郎馬好賢大

理寺丞制八道

劉仲章施遜周同吳安操高定林宗言徐縝

李文卿陳仲成張譚鄭民表韓燁吳大

元劉公臣白贄錢藻段叔獻于觀馮翊

辛景賢朱東之並大理寺丞制十八道



陳確大理寺檢法官制

魏綱右祖良蘇軾何景先何景元張璪並大

理評事制五道

許將簽書昭慶軍節度判官廳公事制

樞密院編脩周革轉官制

勅某語曰前事不忘後事之師也今吾樞密之府自祖宗以至於今不啻百年捍患持危應變之大計與夫將相論議之巨密謀要策有補於世者皆具在此而文書貿亂淆雜而無紀亦何以待後事乎故擇能臣使序次焉而爾以才稱實當其任今遷爾位唯是勉哉可

屯田員外郎任迥等加勲制

勅某等朕獲休享于神而嘉與在位同其福祿爾等並由材選列在郎位相時釐事能勵厥勤甄序有差往其祗服可

張慎修等改官制

勅某等士之選於吏部者多矣以貌以言而取吾皆不足以得之此吾所以推耳目之任而付之刺舉之臣使各察其所部而以賢才告上今爾等從政于外而為刺舉者所稱故吾召見于庭而秩以省寺之官往其勉思所以事君無使稱爾者受不任之咎可

徐師回等改官制

勅某等詩曰不解于位民之攸墜蓋吏能夙夜不懈於其職事以無過失然後民得以服勤而有勸功樂



業之意吾所以制爲祿位以待天下之吏以時論其功狀而進退之凡以爲民也爾等並列於朝而久於其職序遷爾位惟是勉哉可

磨勘轉官制二道

勅某等有司考爾等之伐閱而揚爾等於朝廷朕親覽焉皆應遷法夫命官賦祿之事朕非輕之也維以章有德序有功名在審官則三歲而一遷亦維以閔夫職事之勞而勉之盡力爾等勿謂名器之可計日以自取也而無報上之意焉可

二

勅某虞以九載黜陟庶官周以三歲誅賞群吏其爲法異而勸沮之意同爾之積功實應遷法序進厥位

維以勸能書不云乎德懋懋官功懋懋賞爾則善也朕何愛焉可

明堂宗室加恩制

勅某朕旣肆祀於明堂而大賚以布神之福爾列名屬籍序位內朝肅雝在庭克相釐事以差受寵其往懋哉可

皇姪孫左屯衛大將軍登州防禦使世永  
改隴州防禦使制

勅朕永惟太祖皇帝德加於後世博矣而諸孫爵位莫有顯者甚非所以惇叙九族承宗廟之意也具官某躬率德義克承厥休方將營衛之屯而領兵防之任其正使號稱朕志焉可



皇姪右衛大將軍蘄州防禦使從古登州  
防禦使制

勅朕選於近屬以治親親唯賢與能宜在此位具官  
某躬率德善自昭于時以選攝事久勤不懈其遷使  
號而正其職服之名焉往踐寵榮愈思慎志可

皇姪曾孫太子右內率府率令礎右千牛  
衛將軍制

勅某治天下自人道始而以治親爲先務爾序于屬  
籍率履不違遷率東宮十年於此矣進踐祿次往其  
欽承可

鄭穆太常博士制

勅某士之著籍審官者雖在疏逖猶三歲而一遷又

况以才被選有職事於禁門之內者哉嘉爾言行發  
聞于世膺此恩典往其欽承可

錢袞太常博士制

勅某太常古宗伯之官而博士掌其掾法增損因革  
皆合於事久而不失先王之禮意然後可以爲能其  
任固已重矣今雖職廢而非文學出仕則不得以名  
官爾以叙進而膺此選其尚能勉以求稱哉可

集賢校理周豫太常博士餘如故制

勅某籍於審官之士雖身在外有司會其伐閱歲滿  
輒遷況於以才進選而列職祕近者哉爾維皎良膺  
此恩典往其祗勵以服寵榮可

楊南仲太常博士制



勅其爾文學藝能見稱於世服官惟謹克以有勞丞  
于太常是謂華選遷秩博士往其欽哉可

姚原道太常博士制

勅其爾以藝文出仕而才諳見稱備任遠方有勞當  
錄博士之選往其欽哉可

晏崇讓太常博士制

勅其爾名臣之子行義修飭能以藝文自奮而於職  
事有勞序遷厥官其往祗服可

劉溫太常博士制

勅其爾丞秘書三年矣故稽爾功狀秩于太常爾行  
義才能有稱於世無曰官小往其欽哉可

柴餘慶國子博士制

勅其爾於爲吏才敏見稱會課有司當得遷位博士  
之選往其勉哉可

邵亢太常丞制

勅其古者尚賢而輕爵好藝而賤祿所以士樂羞其  
行而爲時用也爾列于東宮之職事三年於此矣羣  
牧之任開封之選皆能稱職遂佐三司其序爾功進  
官一等若爾之藝文政事吾豈有愛於爵祿乎哉往  
懋厥修以需其後可

蔡說殿中丞制

勅其宗祀之成慶覃䟽遯爾久於常選丁此殊恩甄  
序有榮往其祗服可

晁仲熙殿中丞制



勅某爾以謹潔能不失其世守故積功久次致位於朝往佐一州又應遷法愈其懋勉以稱褒嘉可

王元甫殿中丞制

勅某吏之有籍於審官者三歲一遷所以勸勞也爾以才備任積課應條往服命書愈其思勉可

高應之國子博士張侏太常丞范褒殿中

丞制

勅某等爾等親吾民于外而吾使有司會課于中皆能有勞以應遷法夫上之爵賞無私德惟以治人臣能率職以治人則可謂能報上矣各踐爾位惟時勉哉可

胡掖殿中丞制

勅某汝官在東宮而得列於朝廷之位有司奏課當以時遷夫祿所以等功位所以序德朕所以命汝者每加厚矣汝所以報稱者亦可以勉哉可

王介秘書丞制

勅某朕設科以來異能之士而親發策問之爾言不阿而學問多中乎義理其遷厥位以嘉爾之能言夫士無不能有不為爾若爾之修潔有志而濟之以明敏之才惟所施焉將無不至況於一官之小豈以不稱為患也哉可

毛篋秘書丞制

勅某古人有言曰無常產而有常心者唯士為能夫所謂士者不以無常產而變易其心又奚俟於爵賞



而後勸哉然士之有功則爵賞加焉天下大公之法也爾以進士起而序於王官之列出長一邑之民有勞而無罪三年於此矣其使遷秩以信大公之法朝廷之位亦加顯矣所以爲士者可不勉哉可

許懋傳顏並秘書丞制

勅其爾雖任職于外而功罪之籍實在審官之府以時會課於法當遷夫三歲而序一官在會之所同然材實行治不有以稱其位則孰以爲非苟得也爾以藝文自奮而由稱舉以至於此其知之矣可不勉哉可

陳舜俞秘書丞制

勅其爾以賢良應詔朕嘗親冊而秩以京官幕府三

年序遷一等此特有司之常法爾豈所以待異能之士哉往其勉之以俟時用可

句士良秘書丞制

勅其爾佐著作于秘書三年矣審官稽狀當進一官惟爾以文藝起家而以吏能爲邑往欽新命其克勉哉可

國子監直講商傳光祿寺丞制

勅其爾讀群經而能通知其義故選於衆以教國子有司稽任當以勞遷往服爾官愈其思懋可

張璘光祿寺丞制

勅其爾父爲吾執政之官而爾能夙夜祗飭以修其職事可謂能世其家矣今有司會課而吾以爾丞于



光祿往思勵勉以永燕譽之終哉可

王响光祿寺丞制

勅其詩曰維其有之是以似之以爲賢者之後功臣之世非有以存之則無以似續其前人也爾以蔭籍入官而能舉其職以應有司之遷法可謂知似續其前人矣丞于光祿其往勉哉可

王佺光祿寺丞制

勅其爾大臣之家賢者之後能自策勵不隳其官序勞當遷往踐厥位無忝爾祖乃惟顯哉可

奏舉人前陝州節推郎凡衛尉寺丞制

勅其選於吏部者多矣非使在位者舉其類則善人豈能自進乎爾能勵厥官以多薦者丞于衛尉其愈

祇修可

孫琪衛尉寺丞張次元大理評事制

勅其等材施於一邑知效於一官至于三年而無職事之負焉不可以無報也序進一等往其懋哉可

柴元謹衛尉寺丞制

勅其商之有征久矣所以銷沮游末而勸之力本非特收其贏財佐公上之急而已也爾勤其事以有累日之功序進一官以從大雅無德不報之義爾維世族尚克勉哉可

奏舉人前梓州郫縣主簿陳巨卿衛尉寺

丞奏舉人前權復州軍事推官孫琬大理

寺丞制



勅某選於吏部者多矣非使在位者舉其類則善人豈能自進乎爾能勵厥官以多薦者丞于卿寺其愈祇修可

張服尹忠恕張慎言孫昱太子中舍制

勅某周官三歲則大計羣吏之治而誅賞之故朕時憲以爲考績之法夫吏者三歲能率職礪行而無罪悔是宜有賞序官一等以慰爾勞維爾良能宜加報稱可

薛昌弼雷宋臣太子中舍劉師旦殿中丞制

勅某審官考課之法成於先帝之時朕維奉循以職名器無有親疏遠近使有司一是以待之嘉爾有

勞序遷一等勉共爾位率志忘私庶乎能稱爵賞之公而終無尤於職事可

方蘋高安世張湜傅克並太子中舍制

勅某等吾於爵祿甚慎閔仁百姓甚篤爾等或專一縣或佐一軍而皆列於卿丞之籍蓋嘗有所試矣今有司序功當得遷位吾雖甚慎爵祿而於爾等無所愛焉其勉思拊循百姓以稱吾閔仁甚篤之意可

黃汾太子中舍制

勅某吾擢天下之才而立民長伯萬家之縣又有戎馬之任焉其稱甚難而爾能其事有勞遷秩母廢爾成可

王塾太子中舍制



勅某爾丞于理亦既三年有職事之勞無行義之過使遷厥位著籍外廷夫與於燕而坐於朝報禮亦云異矣往祇乃服其可不思可

奏舉人前永興軍節度掌書記王申等太子中允制

勅某等皆以藝文起家而久於常選才能行義數見推稱楊于朝廷各命以位往共厥服可不勉哉可

雷宋臣太子洗馬制

勅某周人事神以諱而不諱嫌名持循至今遂著爲律爾以難避之諱而辭當拜之官自言冒榮有所不忍其更位號以慰孝思慎爾百爲勉求稱此可

熊本著作佐郎制

勅某吾歲取吏部之選者以爲官監省寺之官常不啻乎百人論者患其多焉詩不云乎濟濟多士文王以寧有天下者豈以士多爲患哉顧其所取何如爾汝藝文政事皆見稱述往踐祿次蓋將有補於時使人視吾所取而不以爲多在汝勉之而已可

高且著作佐郎制

勅某唐虞以三考黜陟幽明而其所命或終身於一職然則其所謂陟者蓋爵服之加而已今之增位猶古之加爵服也以爾久於職事而功用應於有司之法故使增位以報焉雖考績之歲月與黜陟之方古今不同而吾所以褒勵庶工非與唐虞異意爾其毋怠思稱厥官可



國子監直講孫思恭著作佐郎制

勅其爾才能行義有超卓之譽於時故遷於衆以教國子而又寵以校讎之官有司稽勞當得遷位列職東觀往其懋哉可

奏舉人前邠州深澤縣令王廣廉著作佐

郎制

勅其爾用舉者爲縣又能修其職事而舉者衆多升序厥官屬之東觀夫士之有能有爲也豈必戒敕而後勉哉爾以才稱其知自勸矣可

奏舉人編校昭文館書籍孫覺著作佐郎

制

先帝置校讎之官所取皆天下望士爾惇行力學爲

時俊傑治民有紀稱者衆多會課進遷往共厥服可

奏舉人姚闢著作佐郎制

勅其祕書省有著作之官所以待藝文之士爾瞻辭博學而爲吏有聲甄績序材以登茲選往共職服其亦勉哉可

奏舉人游烈等著作佐郎制

勅其等皆以藝文起家而久於常選才能行義數見推稱揚于朝廷各命以位往共厥服可不勉哉可

奏舉人張公庠著作佐郎制

勅其爾嘗爲令而能以材譎爲在勢所稱寘諸京官以懋乃績往踐祿次愈其勉哉可

高膚敏崇大年並著作佐郎制



勅其爾等皆以才能序于莫府舉其職事稱者衆多  
會課超遷往其祗服可

勅其爾等潘及甫著作佐郎制

勅其等選於吏部久矣皆能以才自奮為在位者所  
稱稽狀有司列官省寺往須器使無替厥修可

勅其等奏舉人阮邈著作佐郎馬好賢大理寺丞

制

勅其等省寺之有丞郎其名位高下不同而於今皆  
為遴選爾等從事于外以能見稱有司書勞朕所親  
覽各踐厥位往惟慎哉可

直講劉仲章大理寺丞制

勅其爾方以經術教國子而有司會課當得進遷爾

以通經發聞于世允蹈所學尚何訓哉可

施遜大理寺丞制

勅其三歲一遷朝廷之法爾共其職事在法當遷往  
懋厥修以祗朕訓可

奏舉人周同大理寺丞制

勅其爾能勤厥官以有舉者有司條奏在法宜遷使  
得傳籍於審官以為大理之屬當知夫名器之不可  
以徒得也往思懋勉以稱之可

吳安操大理寺丞制

勅其爾名臣之家能自修飭考論功最當得進遷往  
服官成勿墮所守可

高定大理寺丞制



勅其朕布功賞之信苟有功可以中率則無擇小大遠邇而加焉今有司條奏爾勞在法當賞往丞于理其懋厥官可

林宗言大理寺丞制

勅某有司言爾當遷而朕視功狀如有司之言故使遷爾位一等吾嘗詔有司以時視士大夫功狀而叙進之母使自言欲夫在位知有禮讓而不以官爲利也爾知之矣可不勉哉可

徐績大理寺丞制

勅某爾出於世祿之家而服勤筦庫之事行不愆於法才不曠其官遷以報功往其思勗可

李文卿大理寺丞制

勅某吏之近民者莫如今故位非高也祿非多也而吾不輕以與人爾得爲之以有稱者往施於政又以才稱實諸京官以待任使思永終譽厥惟勉哉可

奏舉人陳仲成大理寺丞制

勅某欽之爲州也窮於山谷之間吏常患乎州窮而刺舉者有所不知爾勤其官而稱者甚衆可謂能矣其進以爲京官往懋乃成以終有譽可

張誼大理寺丞制

勅某古之爵賞與士共之雖有衆譽而功實不副焉亦不可以幸而得也此吾所以闕稱舉之衆而又稽歷試之勞然後命爾以丞于大理也夫去吏部之選而有錄於審官能祇慎不懈以免於文吏之議則雖



高位尚可以循而至可不勉哉可

鄭民表韓燁大理寺丞制

勅某爾服勞州縣才諳見稱甄序厥功使丞于理往  
祇休命惟既爾心可

吳太元大理寺丞制

勅某審官之法三歲一遷爾嘗有罪故使序于大理  
四年而後遷以爲丞賞誅黜陟吾無私焉皆爾自取  
也施於有政可不勉哉可

奏舉人劉公臣白贄並大理寺丞制

勅某等今吾大吏舉非其人有坐斥廢其於舉人豈  
顧不慎哉然而坐斥廢者時時有之此殆求舉者不  
其始終以負之爾今爾等皆以衆舉故吾命以京官  
勉思一其始終以無負於舉者可

國子監直講編校集賢院書籍錢藻大理  
寺丞制

勅某朕設科以招方正之士而爾應其求置局以儲  
儔乂之材而爾充其選有司會課當得進官若爾之  
諒直多聞方且善其行以爲時用往祇厥位可不勉  
哉可

段叔獻大理寺丞制

勅某以爾典京師之獄滿歲於此矣而未嘗有失丞  
于卿位以懋爾勞維朕哀矜庶獄之有不幸爾所知  
也守爾常操尚無誤哉可

奏舉人于觀大理寺丞制



勅某方今漕頻海之鹽以食東南而收其息以佐有司之急倉庾之官一失職而至於耗惡則足以匱國而傷民故稱舉能吏而待之厚賞所以勸也爾從事能有成勞丞干理官往踐無懈可

馮翊辛景賢大理寺丞制

先帝使大吏推舉常選之士以補省寺之屬爾能脩其職事而舉者衆多率由舊章命爾以位往祗厥服以稱甄升可

試大理司直兼監察御史朱東之大理寺丞制

勅某爾以幹謹潔能舉其職事而屢爲在位者所舉歲滿序功法宜有賞理官之屬其往懋哉可

陳確大理寺檢法官制

勅某朕制中典以刑四方非惟不失天下之姦唯以使人無犯有司而已今明試爾才之可使而後以爲屬於理官爾其知恤庶獄之不辜而求所以出之以稱朕哀矜元元之意可

魏綱大理評事制

勅某爾備屬奉常亦已久矣序進厥等以旌有勞夫三歲一遷雖厚祿可以馴而致欲爲善者亦如此矣能積智累勤而不已則亦何所不至乎在爾勉之以求爲可進也可

石祖良大理評事制

勅某士之有籍於審官者皆三歲而一遷今爾歲滿



故吾進爾位加爾祿夫祿以等功而不以志位以序德而不以勞爾世厥家其知勉矣可

應才識兼茂明於體用科守河南府福昌縣主簿蘇軾大理評事制

勅其爾方尚少已能博考羣書而深言當世之務才能之異志力之強亦足以觀矣其使序于大理吾將試爾從政之才夫士之強學贍辭必知要然後不違於道擇爾所聞而守之以要則將無施而不稱矣可不勉哉可

何景先何景元並大理評事制

勅其春秋之義以貴治賤以賢治不肖今天下人民之衆賢者不爲不多爾得列于京官其賢於人宜如何也今爾累日之課又當遷序其位亦云不賤矣其爲賢也亦可以勉哉可

張璠大理評事制

勅其吾推恩大臣之子爾得列於祠官能任事而有勞其以備士官之屬爾父起於閭巷以能大其家室者豈一日之力哉爾惟積勤累善法象而不違則豈特有慶于而宗又將有賞于而國可

前鄉貢進士許將大理評事簽書昭慶軍節度判官廳公事制

先帝親第進士於廷而以爾爲第一爾於藝文可謂能矣所以施於政者朕將有所試而觀焉夫士之遇時不患無位思所以立往其勵勉以副東求可



本無思於思所以立於其間以隔東來西

臨川先生文集卷第五十一

夫帝時率土於五而以爾為某爾於藝文下

禮矣其官職公事時

有禮文士有禮大野時事發善即舉軍

有禮千而宗又其不更下而酒何

豈一日之文時爾其林隆厚善也乘而不舉頃豈

於其以爾士官之職爾又其時爾也以其大其家室

其其吾時恩大田之千爾野地時官推其事而本

其會大野時事時

豈其也亦可以換皆可

